



KEMENTERIAN KESIHATAN MALAYSIA

KENYATAAN MEDIA KEMENTERIAN KESIHATAN MALAYSIA

STATUS SEMASA PENYAKIT BERKAITAN CUACA PANAS

14 APRIL 2024

Kementerian Kesihatan Malaysia (KKM) ingin merujuk kepada status cuaca panas yang dikeluarkan oleh Jabatan Meteorologi Malaysia (METMalaysia), Kementerian Sumber Asli dan Kelestarian Alam pada 13 April 2024, kawasan yang berada pada Tahap Amaran 1 (Berjaga-jaga dengan suhu maksimum harian 35 °C hingga 37°C sekurang-kurangnya tiga (3) hari berturut-turut) adalah di seluruh negeri Perlis, Kedah (Pulau Langkawi, Kubang Pasu, Kota Setar, Pendang, Yan, Kuala Muda, Kulim, Bandar Baharu, Baling, Padang Terap, Sik), Pulau Pinang (Timur Laut), Perak (Hulu Perak, Kuala Kangsar, Kinta), Kelantan (Gua Musang), Pahang (Raub), Sarawak (Limbang) dan Sabah (Tenom, Beaufort, Tuaran).

Satu (1) kawasan direkodkan berada di Tahap Amaran 2 (Gelombang Haba dengan suhu maksimum harian melebihi 37°C hingga 40°C sekurang-kurangnya tiga (3) hari berturut-turut) iaitu Pokok Sena, Kedah. Pada masa yang sama, MET Malaysia juga menjangkakan cuaca kering dan panas dengan suhu melebihi 35°C masih berlaku di kebanyakan tempat di Semenanjung dan Sabah sehingga pertengahan April 2024.

Pemantauan yang dijalankan oleh Kementerian Kesihatan Malaysia sehingga 13 April 2024 mendapati terdapat **45 kes penyakit berkaitan haba** dilaporkan melibatkan 33 kes kelesuan haba, 11 kes strok haba dan satu (1) kes kejang haba. Kes-kes mengikut pecahan negeri adalah lapan (8) kes di Perak, lapan (8) kes di Kedah, enam (6) di Selangor, lima (5) di Johor, lima (5) di Negeri Sembilan, lima (5) kes di Pahang, empat (4) kes di Sabah, dua (2) kes di Perlis, satu (1) kes di Pulau Pinang dan satu (1) di Kelantan.

Secara kumulatif, dua (2) kes kematian akibat strok haba telah dilaporkan. Kes kematian pertama adalah seorang lelaki berumur 22 tahun dan kes kematian kedua adalah seorang kanak-kanak lelaki berumur tiga (3) tahun di Kelantan. Pada masa ini, terdapat empat (4) kes yang masih mendapat rawatan di hospital iaitu satu (1) kes strok haba yang dirawat di Unit Rawatan Rapi dan tiga (3) kes dirawat di wad biasa, yang terdiri daripada dua (2) kes strok haba dan satu (1) kes kelesuan haba. Kes-kes lain telah sembuh dan didiscaj. Kes yang dirawat di Unit Rawatan Rapi melibatkan seorang lelaki berumur 24 tahun telah dimasukkan ke Unit Rawatan Rapi Hospital Port Dickson semenjak 10 Mac 2024 dan telah dipindahkan ke Unit Rawatan Rapi Hospital Tuanku Jaafar, Seremban, pada 5 April 2024.

Sehubungan itu, KKM menasihatkan agar semua pihak meneruskan langkah berjaga-jaga dengan memastikan tahap hidrasi yang mencukupi dan mengurangkan aktiviti fizikal lasak, serta aktiviti-aktiviti di luar rumah pada musim cuaca panas sekarang. Orang awam juga diminta agar mengelakkan diri daripada terdedah kepada cuaca panas, banyakkkan berteduh dan berehat lebih kerap semasa cuaca panas, memilih untuk melakukan ziarah pada waktu kurang panas atau waktu malam, terutamanya ketika

mengunjungi sanak saudara dan rakan taulan semasa perayaan.

Orang awam boleh mendapatkan maklumat terkini status cuaca panas di laman sesawang MetMalaysia (<https://www.met.gov.my/iklim/status-cuaca-panas/>) dan langkah-langkah pencegahan bagi mengurangkan kesan kesihatan akibat cuaca panas di laman sesawang KKM (<http://www.myhealth.gov.my/cuaca-panas-a-kesihatan>).

DATUK DR. MUHAMMAD RADZI BIN ABU HASSAN
KETUA PENGARAH KESIHATAN MALAYSIA

14 APRIL 2024